

Ohmächtigi Brieder 2008

Mir drille duure

Wenn s z Basel widder vieri schloot,
Bliggsch uff, ob jedes Liecht abgoht.
Und mänge Bligg goht au zem Himmel
Bim Martinsgleggli sim Gebimmel.
Es wetti – wie Du waisch – die Glogge
In Schaare d Lyt an d Herbschtmäss logge.
Denn sett sich au um Himmelswille
E Riiserad am Himmel drille.
D Schwoobe bringe das uff d Pfalz,
Und alles fluecht, im Wüethrich gfallt s.
Das bayrisch Rad, so hersch en munggle,
Das passi besser dert ins Dungle.
Doch s Basler Raad, me isch s scho gwohnt,
Singt „Stille Nacht“ und luegt in Mond.
S git beesi Wort, Stryt, dummi Schnure.
Doch s Raad, das drillt. Mir drille dure.

Wenn z Basel d SVPler taage,
Denn platzt ys scho e bitz dr Kraage.
De schwarze Schoof bloost me dr Marsch
S griegt d Zanolari Tritt in Allerwärtische.
E Basler Bangg singt – da'sch nid gschiggt.
In waas het däa sich nur verstriggt?
Es klatsche alli, glychwohl stuun y.
E Bangg für Buure, Bonze, Bruuni.
Und d Schänggel klopft me sich ganz gheerig.
D Frau Fasnacht witteret e Verschwerig.
Doch numme kurz duurt dä Triumph
Denn schrumpft dr Blocher z Bärn zum Schlumpf.
Dr Baader schwimmt und s Murer's murre
D Partei rotiert. Mir drille dure.

Wenn z Basel alli Parkplätz sueche,
Denn hilft nimm bätte, hilft nimm flueche.
Gääl wird us blau, blau wird us wyss,
Mir froogen ys, was sell das Gschyss?
Me will ys under d Nase ryybe,
Die Waggis kennt me so vertryybe.
Im Elsass, wo sy nyd verschwände,
Do waisch jo, wo die Zeedel ände.
E Buess us Basel, das mergsch glyy,
Goht deene doch am Arsch verbyy.
Mir sueche, flueche, schimpfe, knurre
Und drille Runde, drille dure.

Wenn z Basel aini ebbis schrybt,
Wo d Lehrer schier zer Wyssgluet tryybt.
Si ka d Kollege so errege,
Dass sich au Lehrer kurz bewege.
Wenn d Schieler aifach penne kenne,
Derfiir denn d Eltere Buesse brenne.
Denn frooge Eltere, Lehrer, Goofe:
Isch denn dä Eymaa no am Schloofe?
Wach uff, Dii bruuchts au zwischeduure.
Doch dä drillt Duume. Mir drille dure.

Wenn z Basel hochi Polizische
Versueche, ihre Stall uszmischte.
Me gsehts am Bahnhof, liist s im Tram,
Sy sueche Neyi, fit und stramm.
Werum lehn die grad fir so Sache
Dr Murat Yakin Wärbig mache?
Vo Optima hersch d Schugger schnure.
Uns drillt s im Kopf, mir drille dure.

Wenn z Basel im Beschaffigsstress
Lut joomere hersch dä TCS.
Denn ggesch no, wie dä Blächverband
Us em Muggli macht en Elifant.
Und alli hebe d Hand und d Schnure,
Denn drille nid nur d Reeder dure.

Wenn z Basel vor de Wiehnachtsgschängg
Scho iebe muesch fir d Schnitzelbängg.
Gits statt Wiehnachtsgutzi Ziibelewaie,
Denn kennte mir grad duredraie.

Wenn z Basel sich s so wyyter drait:
Mir drille dure, wie scho gsait.

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwoch demoorge!
Deert und an de 3 Verkaufsständ (CINS) in dr Stadt ka
men au alli Zeedel und Schnitzelbängg, d Blaggedde
und dr Rädäbäng kaufe.
